

Njan aagbaŋ ki Pɔɔl ŋmɛɛ ki tii TIMOTI na

¹ Min Pɔɔl ye Yesu Kristo aakpambal la; ba pu? Uwumbɔr u gaal timi lir na, ni Tidindaan Yesu Kristo u tii timi limakl na, bima le len ke m li ye waakpambal. ² M ŋmɛɛ kigbaŋ kee m tii si Timoti, u ye maabo bamɔnn Uwumbɔr aasan ni na la. Tite Uwumbɔr ni Tidindaan Yesu Kristo ŋa tinyoor ŋa aa pu, ki san si kinimbaak, ki tii si nsuudoon.

Tinyamɔnbɔr aasurm

³ Maah nan cha Masedonia aatiŋ ni na, m nan bui si ke aa li beenin bi Efesus aatiŋ ni; ba pu? binib bibaa bi nima ki mɔk binib mmɔkm mu kaa ye Yesu aamɔkm na. Aa sur bi ke bi taa ki mɔk kina, ⁴ ki taa ki joo ŋiyimbil ŋi bi Uwumbɔr Aagbaŋ ni na tiini itiin baah nan ŋani pu na. Nimina le cha binib baa mbaan. Naa ter bi ke bi gaa Yesu ki kii aan ki dii waasan mbamɔm. ⁵ M tuk si ke aa sur bi kina; ba pu? m ban ke Yesu aanib aasui li bi chain, ki ban ke bi bee bisui ni ke titunwanbir aa bi bi chee, ki gaa Yesu ki kii mbamɔm, ki li gee tɔb. ⁶ Binib bibaa bi, kaa ki dii kina. Bi yenn la, ki gbaa tɔb chee tibɔr ti ye fam na. ⁷ Bi ban bi li ye bimɔmɔkb bi mɔk binib Uwumbɔr aakaal na, ki mu aa bee baah len pu na aatataa, ki len tibɔr ke binib bi nyi taatataa na, ki mu aa nyi.

⁸ Tɔ, ti nyi ke unii yaa joo Uwumbɔr aakaal, uma Uwumbɔr aah ban pu na kan, nkaal ngbaan ŋan la. ⁹ Ti yaa nyi ke nkaal aa bi bininyaam pu kan, nkaal ngbaan ŋan la. Mu bi tiniwanbir le pu, ni binib bi kaa gee bi ŋun tibɔr na, ni binib bi kaa dii Uwumbɔr aasan na, ni titunwanbirdam, ni binib bi yii Uwumbɔr kaa pak u na, ni binib bi ku bitetiib

ni binatiib na, ni binib bi ku biken na, ¹⁰ ni binib bi gər kidagook na, ni bijab bi yii bipiib ki ban bijab na, ni binib bi chur biken tinaagbiir na, ni binib bi chuun mənɪ inyamən na, ni binib bi puur Uwumbər yəl yəl na, ni binib bi ɲani tiwan ni kaa dii mməkm mu ɲan na. Nkaal ngbaan bi titunwanbir timina məmək pu la. ¹¹ Uwumbər aabənyaan len kina la, ki tuk timi Uwumbər u ti pak u na aah ɲan sakpen pu na. Uma le di tibənyaan tee ɲa ɲjaal ni, ke m di tuk binib.

Uwumbər aah san Pəəl kinimbaak pu na

¹² M dooni Tidindaan Yesu Kristo u tii mi mpəən ke m tun lituln ngbaan na la. U len ke m ye mbaməndaan, ki lee mi ke m tun waatuln. ¹³ N-yoonn mu jer na, m nan len tibəbir u pu, ki seei u, ki ɲa waanib falaa. Maah kaa nan gaa u ki kii n-yoonn ngbaan na, le maa nan nyi ke m ɲani ni kaa ɲan na. Maah kaa nan nyi na, le Uwumbər san mi kinimbaak, ¹⁴ le Tidindaan Yesu Kristo mu gee mi sakpen, ki cha m gaa u ki kii, ki kpaan u ni, ki gee u ni waanib məmək. ¹⁵ Yesu Kristo nan dan dulnyaa wee ni ke u nan nyan titunwanbirdam baatunwanbir ni la. Tibər timina gbii la. Ni ɲan ke binib məmək gaa ti ki kii. Min le ye titunwanbirdaan ki jer binib məmək. ¹⁶ Le Uwumbər san mi kinimbaak. Yesu Kristo ɲa suklaa, min u ye titunwanbirdaan ki jer binib məmək na pu sakpen la. Waah ɲa mi suklaa pu na, nima le mək binib bi ga gaa u ki kii ki kan liməfal li kaa kpa ndoon na, waah kpa suklaa pu na. ¹⁷ Cha ti pak Uwumbər, ki nyuɲ u. Uma le ye Uwumbər baan; tinimbil aa waa u; u ye Ubər kpaan u ga li bi n-yoonn mu kaa kpa ndoon na, kaan kpo. Amii.

¹⁸ Maabo Timoti, Uwumbər Aafuur Nyaan nan cha m len tibər aa pu, nima le cha m tuk si saah ga tun Uwumbər aatuln pu na. Cha Nfuur Nyaan aabər ngbaan tii si mpəən ke aa yii kinimbəɲ, ¹⁹ ki tii Yesu naadii mbaməm, ki taa di

cha, ki li ɲani tiwan ni aa bee ke ni tok na. Binib bibaa bi, ki nyi ni ɲan na, ki mu aa ɲani kina. Nima le baa ki dii Yesu aasan. ²⁰ Bi ponn ni binib bilee ye Haimeneus ni Aleksanda. Le m di bi ɲa kinimbɔɲ aɲaɲal ni ke ki daa bitafal, aan bi bee ke naa ɲan bi ki sii Uwumbɔr.

2

Naah ga li dooni Uwumbɔr pu na

¹ Tɔ, tibɔr ti ye tibɔkpaan na le ye ke m ban ke ni li mee Uwumbɔr ki tii binib mɔmɔk, ki li gaɲni u ke u san bi kinimbaak, ki li dooni u bi pu. ² Ni li mee Uwumbɔr kina ki tii bibɔrb, ni kitiɲ aayidam mɔmɔk, aan ti li bi tibaa pu, ki li kpa nsuudoon, ki li dii Uwumbɔr aasan, ki li ɲani tiwan mɔmɔk mbamɔm.

³ Ni yaa mee Uwumbɔr kina kan, ni ɲan, ki piir Uwumbɔr u gaal timi lir na aasui. ⁴ U ban ke binib mɔmɔk ɲmar, aan ki bee waabɔr ti ye mbamɔn na. ⁵ Ba pu? Uwumbɔr ye Uwumbɔr baan la. Uchandatuln ubaa baanja le bi Uwumbɔr ni binib aakaasisik ni. Uma le ye Yesu Kristo u nan kpaln unibɔn, ⁶ ki sil binib mɔmɔk aasisiyyaan ki kpo, ke u gaa bi lii na. Naah nan ɲeer buyoonn na le Uwumbɔr mɔk timi tibɔnyaan ngbaan. ⁷ Nima pu le Uwumbɔr lee mi ke m li ye Yesu aakpambal, ke m tuk binib bi kaa ye Juu yaab na Yesu aabɔr ngbaan, ke bi gaa u ki kii, ki bee waabɔr ti ye mbamɔn na. Maa mɔn nnyamɔn, maah len pu na gbii la.

⁸ M ban ke bijab bi bi ɲipepel mɔmɔk na mee Uwumbɔr, ki yoor iɲaal paacham. Bi li ye binib bi bi chain na, ki taa li kpa liɲuul, ki taa li kpa kinikpakpak.

⁹ M ban ke bipiib li pee tiwanpeenkaan ni ɲeer bipiib bi dii Uwumbɔr na, ki li bi suuna, ki taa li kpa kalmbaani, ki taa fiini tiyikpir sakpen siini, ki taa tuun ɲitafajɔn ɲi kpa kidaak na, ki taa gbin nleen mu kpa kidaak na, ki

taa li peeni tiwanpeenkaan ni kpa kidaak na. ¹⁰ Bi li tun litunyaan. Nima le ŋan tii bipiib bi len ke bi dii Uwumbør aasan na. ¹¹ Bi li ŋmin ki li bae Uwumbør aabør ki li ŋun tibør. ¹² Maa kii ke bipiib tuk bijab Uwumbør aabør, kaa kii ke bi li ye bijab aayidam. Bi li ŋmin. ¹³ Ba pu? Uwumbør nan puen naan tiyaaja Adam, le ki nin naan upuu iif. ¹⁴ Kinimbørŋ aa nan ŋmann Adam, ki nan ŋmann upii ngbaan la, le u tun titunwanbir. ¹⁵ Tɔ, bipiib mu yaa gaa Yesu ki kii, ki gee binib, ki bi chain, ki bi suuna kan, bi ga ŋmar imalween ni.

3

Bisalolm aabør

¹ Tibør tee gbii la, ke unii yaa ban u li ye Yesu aanib aaninkpel kan, ni ŋan; ba pu? li ye lituln li ŋan na la. ² Ni ŋan ke Yesu aanib aaninkpel taa li kpa taani ubaa. Ni ŋan u li joo upiibaab, ki li chur ubaa tiwan mɔmɔk ni, ki li kpa laasaab, ki li bi mbamɔm, ki li channi bicham tichann, ki li ye unii u ga ŋmaa tuk binib Uwumbør aabør mbamɔm na. ³ U taa li ye udagbiir, ki taa gbaa binib [ki taa li kpa iniman]. U li bi suuna ki taa li kpa kinikpakpak. Unimbil taa li man ŋimombil pu. ⁴ Ni ŋan ke u li joo waachiln ni aanib mbamɔm, ki li joo waabim mbamɔm, aan bi li pak u ki kii waamɔb. ⁵ Ba pu? unii yaa kaa ŋmaa joo waachiln ni aanib mbamɔm kan, u ga ŋa kinye ki li joo Yesu aanib? ⁶ U taa li ye unii u kaa yunn Uwumbør aasan ni na. U yaa ye unii u kaa yunn Uwumbør aasan ni na kan, nibaakan, u ga li kpa kigaak, ki kan ntafadaan ke kinimbørŋ na. ⁷ Ni ŋan ke Yesu aanib aaninkpel li ye unii u kpa kipak binib bi kaa dii Yesu aasan na chee, aan binib taa galn u ki cha u lir kinimbørŋ aagaawɔb ni.

Biteterb aabør

⁸ Tɔ, ki joo cha Yesu aanib aateterb wɔb na, ni ŋan ke bi mu li kpa laasaab. Bi taa len fam fam. Bi li ŋani baah len pu na. Bi taa li ye bidagbiib. Binimbil taa li man ŋimombil pu. ⁹ Ni ŋan ke bi li joo tibɔbɔrkaan ti kpiir, ki ye Yesu aabɔr na, ki li nyi mbimbin mu ŋan na, ki li ŋani kina. ¹⁰ Binib yaa ban bi li ye biteterb kan, cha Yesu aanib aaninkpiib puen lik baabimbin aah bi pu na waahr, bi yaa kaa kpa taani kan, cha bi li tun biteterb aatuln. ¹¹ Ni ŋan ke bipuutiib mu li kpa laasaab, ki li chur bibaa, ki li ŋani tiwan mɔmɔk mbamɔm, ki taa li ye binibiinib. ¹² Ni ŋan ke Yesu aanib aateterb li joo upii ubaabaa, ki li joo baabim ni baachiln ni aanib mbamɔm. ¹³ Binib bi tun biteterb aatuln ngbaan mbamɔm na ga kan liyimbil, ki li kpa lipobil sakpen ki tuk binib baah ga gaa Yesu Kristo ki kii pu na.

Tibɔbɔrkaan kpaan

¹⁴ Tɔ, m kpa limakl ke naan yunn, m ga dan aa chee. Le maah ŋmee kigbaŋ kee tii ni si na, ¹⁵ m yaa yunn kan, aa ga bee mbimbin mu ŋan tii Uwumbɔr Aadichal ni aanib, bi ye Uwumbɔr u ye limɔfadaan na aanib na. Waabɔr ti ye mbamɔn na bi biŋaal ni la, le bi joo ti. ¹⁶ Uwumbɔr aah kpiir waasan aabɔr ti tuk timi na, ti ye tibɔkpaan la:

U nan yoor unibɔn aawon, ki nyan ubaa mpaan pu.

Uwumbɔr Aafuur Nyaan le mɔk ke u ŋan.

Uwumbɔr aatuuntiib waa u.

Binib moon waabɔr ki tuk ŋitimbol aanib,

le binib gaa u ki kii dulnyaa wee mɔmɔk ni.

Uwumbɔr nan yoor u ki di buen paacham, ki nyuŋ u.

4

Bimɔmɔkb bi ye binyamɔndam na

¹ Tɔ, Uwumbɔr Aafuur Nyaan len mpaan pu, ke n-yoonn mu choo na binib bibaa ga yii Yesu aabɔr, ki kii inyamɔn,

ki dii bipõnib bi ñmanni bi na. ² Bipõnib ngbaan ga cha binib bibaa ñmann ke bi mæk binib Uwumbõr aasan. Bi ye binyamõndam la. Baalandak aa ki muk bi baatunwanbir pu. ³ Bi ga len ke bijab taa din bipiib, bipiib mu taa møn bijab. Bi ga li kõ tijikaar tibaa. Uwumbõr le naan tijikaar ngbaan. U ban ke binib bi gaa u ki kii ki nyi mbamõn na le ji ti, ki doon u ti pu. ⁴ Tiwan nimæk Uwumbõr naan ni na, ni ñan la. Ti taa li kõ tijikaar tibaa. Ti li ji ti, ki li dooni u ti pu. ⁵ Ba pu? taah ji tijikaar ti ki dooni Uwumbõr ti pu na, nibaa aa bi ti ni; ba pu? Uwumbõr len ke ti ñan.

Yesu Kristo aatutunn bamõnn

⁶ Aa yaa teer Yesu aanib tibõr timina kan, aa ye Yesu Kristo aatutunn bamõnn la. Saah bae Yesu aabõr ki dii nsanyaan pu na, nima le cha saabimbin bi mbamõm. ⁷ Aa taa gar binyamõndam ngbaan aatiin; ba pu? itiin ngbaan aa kpa tinyoor ki tii si, kaa mæk si Uwumbõr aasan. Chuu aabaa ki bae Uwumbõr aabõr. ⁸ Unii yaa san ke uwon yabr kan, ni kpa tinyoor siib la. Unii yaa chuu ubaa ki bae Uwumbõr aasan kan, nima le ye tinyoor sakpen ki tii u. Ba pu? Uwumbõr puu tipuur ke nima le ga tii binib limõfanyaan dandana wee, ni n-yoonn mu choo na. ⁹ Tibõr tee gbii la. Ni ñan ke binib mømæk gaa ti. ¹⁰ Nima le ti tun Uwumbõr aatuln linimaln; ba pu? ti gaa Uwumbõr u ye limõfadaan ki gaal binib mømæk lir na ki kii la. Uma le gaal binib bimæk gaa u ki kii na lir.

¹¹ Mæk binib tibõr tee, ki tuk bi ke bi li ñani kina. ¹² Taa cha bi lik si fam ke aa ye unachipõõn la. Li len iliinyaan, ki li bi mbamõm, ki li gee binib, ki li tun Uwumbõr aatuln mbamõm, ki li bi chain, aan ki li ye limõkl ki mæk binib bi gaa Yesu ki kii na baah ga li dii mbamõm pu na. ¹³ Li karni Uwumbõr aabõr tii binib, ki mæk bi taatataa, ki tuk bi baah ga li ñani pu na. Li ñani kina linimaln, ki nan saa buyoonn m ga fuu ni na. ¹⁴ Taa suln Uwumbõr Aafuur Nyaan aapiin

i bi aa ni na, i Uwumbør nan tii si buyoonn waabønabtiib nan len, aan Yesu aanib aaninkpiib di biŋaal paan aa pu na. ¹⁵ Maah tuk si pu na, li ŋani kina mbamøm ki cha aanimbil li man ni pu, aan binib mømøk bee saah dii Yesu aasan mbamøm pu na. ¹⁶ Li nyi saabimbin aah bi pu na, ki li nyi saah møk binib Yesu aabør pu na. Li beenin ŋani maah tuk si pu na. Aa yaa beenin ŋani kina kan, sin aabaa ga ŋmar, le binib bi mu ŋun Yesu aabør aa chee na mu ga ŋmar.

5

Usaloln aah ga li joo Yesu aanib pu na

¹ To, taa kae uja u por na. Li sur u ke aate na. Li ŋani bijab bi kaa por na ke aanaabitiib na. ² Li ŋani bipiib bi por na ke aana na. Li ŋani bipiib bi kaa por na ke aaninkpatiib na, ki li bi chain bi chee.

³ Li ter bikpopiib bi sil ye bikpopiib na. ⁴ Ukpoppii mu yaa kpa mbim, bee u ti ki kpa yaabitiib le kan, ni ŋan ke bi bae Uwumbør aah ban ke bi ter baachiln ni aanib pu na, ki teen binatiib, ni biyaatiib, baah nan kpiin bi pu na; ba pu? nima le piir Uwumbør aasui. ⁵ Ukpoppii u sil ye ukpoppii ki gur ubaa na kpa limakl Uwumbør pu la. Le u ga li mee Uwumbør ki gaŋni u nwiin pu ni kinyeek. ⁶ Ukpoppii u kaa bi mbamøm na ma kan, u lann limøfal Uwumbør chee ki laa chuun fu. ⁷ Tuk Yesu aanib ke bi li ŋani maah len pu na, aan bikpopiib bi bi bikaasisik ni na taa li kpa ngalm. ⁸ Unii u kaa ter udo yaab, kaa ter uma ubaa aachiln ni aanib ki jer biken na, u yii Yesu aasan le na, ki ye kiniwanbiik ki jer binib bi kaa gaa Yesu ki kii na.

⁹ Ukpoppii yaa kaa fuu ŋibin imonko itaa kan, aa taa ŋmee waayimbil bikpopiib aagbaŋ ponn ni. Uchal yaa nan ye ujabaan kan, ¹⁰ binib yaa len ke upii ngbaan tun litunyaan: u yaa nan kpiini mbim mbamøm, ki yaa nan ŋani bicham tichann, ki yaa sunn ubaa taab ki tun lituln

tii Yesu aanib, ki yaa nan ter binib bi bi limukl ni na, aan unimbil yaa man litunyaan mòmək pu kan, aa ηmee waayimbil bikpopiib aagbaη ponn ni.

¹¹ Taa ηmee bikpopiib bi kaa por na aayimbil; ba pu? bijab aakpeek yaa chuu bi kan, bi ga di Kristo aatuln lii, ki ban ke bi mən tichal, ¹² kaan gbiin baah puu tipuur ti na. Nima le bi ga li kpa ngalm. ¹³ Ki ki kpee na, bi ga li san ligbanyakl, ki ga li chaa ηdichal ηdichal ni. Naa ye ke bi ga li san ligbanyakl baanja la, bi ga li ye bibətukb la, ki ga li koo binib aabər ni, ki ga len naah kaa ba ηan bi len pu na. ¹⁴ M ban ke bikpopiib bi kaa por na mən tichal, ki maa mbim, ki li lik baachiln ni aabər, ki taa tii timi aadim nsan ke bi galn timi. ¹⁵ Ba pu? bikpopiib bibaa yenn, ki dii kinimbəη aasan. ¹⁶ Tə, bikpopiib yaa bi upii u gaa Yesu ki kii na do kan, ni ηan ke u li ter bi, aan ki taa muk Yesu aanib ke bi ter bikpopiib ngbaan. Nima le bi ga ηmaa ter bikpopiib bi kaa kpa do yaab na.

¹⁷ Tə, ni ηan ke Yesu aanib pa baaninkpiib bi joo bi mbaməm na lipal li wiir na. Yesu aanib aaninkpiib bi tun lituln linimaln, ki mooni tibənyaan tee, ki mək binib taatataa na, ni ηan ke bima le aapar li wiir jer biken yaan. ¹⁸ Ba pu? Uwumbər Aagbaη len ke, “Aa yaa joo unaaja poi idi kan, aa taa buu uməb,”* ki ki len ke, “Ututunn aapar ηeer u la.”† ¹⁹ Tə, bi yaa galn Yesu aanib aaninkpel kan, taa gar baah len pu na, see biseeraadam bilee bee bitaa len kina. ²⁰ Kae binib bi tun titunwanbir na Yesu aanib mòmək aanimbil ni, aan bi gur na san ijawaan.

²¹ M sur si Uwumbər ni Tidindaan Yesu Kristo ni waatuuntiib bi u nyan bi na aanimbiin ni la, aa li ηani maah len pu na, ki li joo Yesu aanib mbaməm, ki taa li kpa imaagann. ²² Unii yaa kaa yunn Uwumbər aasan ni

* 5:18 : Lik Ikaal 25.4. † 5:18 : Lik Matiu 10.10; Luk 10.7.

kan, taa nyan u ke u tun Uwumbør aatuln. Taa cha biken aatunwanbir li ye saataani. Cha saabimbin li bi chain.

²³ Saah kaa kpa laafee kpala kpala na, taa ki nyu nnyun baanja, aa nyu n̄subil aadaan siib, aan ni ter aaponn ni.

²⁴ Binib bibaa aatunwanbir bi mpaan pu, ki tii bi n̄tafadaan mala. Bibaa mu aatunwanbir aa kpiir mala.

²⁵ Kina le litunyaan mu bi lipaal. Li yaa b̄b̄ kan, laan li b̄b̄ n-yoonn m̄m̄m̄k.

6

¹ T̄, Yesu aanib ponn ni bi ye binaagbiib na, bi m̄m̄m̄k li pak bidindatiib mbam̄m̄, aan binib taa bii Uwumbør aayimbil, ni waab̄r. ² Binaagbiib bi kpa dindatiib bi gaa Yesu ki kii na taa lik bidindatiib fam, ke bi ye binaabitiib. Bi li moo tun lituln tii bidindatiib ngbaan ki jer baah ba ga tun pu na; ba pu? dindatiib bi kan tinyoor baatuln ponn ni na ye binib bi gaa Yesu ki kii na la, le bi gee bi.

Yesu Kristo aanib aasurm

Tuk bi ki sur bi ke bi li n̄jani kina. ³ Tidindaan Yesu Kristo aab̄r le ye tib̄nyaan, ki m̄k timi taah ga dii Uwumbør aasan mbam̄m̄ pu na. Unii ubaa yaa m̄k bi mm̄km̄k yayan kaa kii tib̄r ngbaan kan, ⁴ u ye kalmbaanidaan la, kaa nyi nibaa. U gee ke u kpak kinikpakpak ib̄liin aatataa pu. Nima le cha lipiipoln, ni tib̄r, ni n̄siibil bi, ki cha binib dak ilandak i kaa n̄jan na t̄b̄ pu. ⁵ Le binib bi dak ilandakbir na kpak t̄b̄ kinikpakpak. Baa ki nyi mbam̄n. Bi dak ke Uwumbør aasan ye liwankpal aasan la. [Nya binib ngbaan chee.]

⁶ T̄, unii aanimbil yaa gbiin waah kpa ni na pu ki yaa dii Uwumbør aasan kan, nima le ye tinyoor sakpen ki tii u. ⁷ Taah nan dan dulnyaa wee ni buyoonn na, taa nan joo ni nibaa. Taah ga ki nya dulnyaa wee ni buyoonn na, taan ki n̄maa joo nibaa ki di nya. ⁸ Nima pu na, taah

kpa tijikaar ni tiwanpeenkaan ni na, cha tinimbil gbiin ni. ⁹Binib bi aanimbil man liwankpal pu na ga kan ntɔŋ, ki lir. Binimbil ga li man kijork aawan sakpenn le pu. Ni ye fam la, ki ga bii bi. Tiwan ngbaan aaboln le cha binib bee fam ki kan ntafadaan mu kaa kpa ndoon na. ¹⁰Binib yaa gee ŋimombil sakpen kan, nima le cha bi tun titunwanbir mək aabɔŋ. Binib bibaa aanimbil aah man ŋimombil pu pu na le cha bi yenn, kaa ki dii Yesu aasan, ki kan mpombiin ki ti char jer.

Nsurm ki tii Timoti

¹¹ Saah ye Uwumbɔr aanii na, yii titunwanbir timina mɔmɔk, ki li dii mbimbinyaan, ki li bi Uwumbɔr aah ban pu na, ki li tun waatuln mbamɔm, ki li kpa ngeehm, ni suklaa, ki li bi suuna. ¹² Saah tii Yesu naadii pu na, ni ŋan ke aa pɔɔn aabaa ki yii lituln limɔk kaa ŋan na, ki li ŋub limɔfal li kaa kpa ndoon na mbamɔm. Uwumbɔr yin si ke aa nan kan limɔfal ngbaan, buyoonn aa nan tii seeraa nyaan binib pam aanimbil ni, ki tuk bi saah gaa Uwumbɔr ki kii pu na. ¹³ Yesu Kristo nan tii seeraa nyaan Pontius Pailat aanimbiin ni. Le m sur si, uma Yesu ni Uwumbɔr u tii tiwan mɔmɔk limɔfal na aanimbiin ni ¹⁴ ke aa tun Uwumbɔr aah tii si lituln li na mbamɔm, ki li bi chain, ki taa li kpa taani ubaa, ki nan saa Tidindaan Yesu Kristo aah ga gir ni buyoonn na. ¹⁵ Ni yaa nan ŋeer kan, Uwumbɔr ga cha u gir ni. Uwumbɔr u ti pak u na, uma baanja le ye tiwan mɔmɔk Aayidaan. U ye bibɔrb mɔmɔk Aabɔr, ki ye dindatiib mɔmɔk Aadindaan. ¹⁶ Uma baanja le ye limɔfal li kaa kpa ndoon na Aadindaan. U bi nwiihn ni la. Ubaa aan ŋmaa duun mu ni. Ubaa aanimbil aa kee kan u. Ubaa mu aan ŋmaa kan u. Cha binib mɔmɔk nyuŋ u, ki kii waamɔb n-yoonn mu kaa kpa ndoon na. Amii.

¹⁷ Aa sur binib bi kpa liwankpal dulnyaa wee ni na ke bi taa li kpa kalmbaani, ki taa li kpa limakl liwankpal ngbaan

pu. Ba pu? li ye libuln la. Bi li kpa limakl Uwumbər pu. U tii timi sakpen, le taa ti ki nyi ni məmək; u ban ke ti gaa, ki li kpa mpopiin. ¹⁸ Tuk biwankpadam ngbaan ke bi li ter biken, ki li tun litunyaan sakpen, ki li kpa tibulchinn, ki li ban ke bi yakr baawankpal tii biken. ¹⁹ Bi yaa ɲa kina kan, bi ga di liwankpal bil paacham. Ni ga li ye nterm nyaan le ki tii bi n-yoonn mu choo na, le bi ga kan liməfal li ye libaməln na.

²⁰ Timoti, li joo tibər ti Uwumbər di ɲa aarjaal ni na. Binib bibaa len tibər yəl yəl, ki yii Uwumbər aabər, ki dak ke bi nyi la, kaa nyi. Yii baah len pu na. ²¹ Ba pu? binib bibaa bi, ki len ke bi nyi nnyim, ki mu yenn, kaa ki dii Yesu aasan.

Tɔ, Uwumbər ɲa tinyoor ɲa ni pu.

Uwumbør aagbar
Bible without Deuterocanon in Konkomba

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Konkomba

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

